

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- पुंछ च आतंकवादिएं दे इक बड्डे ठिकाने दा पता लाइयै सुरक्षाबलें उत्थुआं भारी मात्रा च थेहार, गोलाबरुद ते नशीले पदार्थ बरामद कीते न।
- खित्ते च आतंकवादिएं दी मजूदगी बारै खूफिया जानकारीयां थोने परैन्त हीरानगर च उप्परोतली दुए ध्याड़े बी सुरक्षाबलें दा तपाशी अभियान बरोबर जारी ऐ।
- लेफ्टिनेंट गवर्नर मनोज सिन्हा होरें कल जम्मू च तवी फिल्मोत्सव दा उद्घाटन कीता। उ'नें आखेआ जे सिनेमा गी समाजी बदलाव आह्मने आह्ला होना लोड़चदा ऐ।
- उपमुख्यमंत्री सुरिंदर चौधरी होरें नौजवानें गी आखेआ ऐ जे ओह शहीदे आजम भगत सिंह हुंदे ज्नेय म्हान क्रांतिकारिएं थमां प्रेरणा लेंदे होई नशे खलाफ लड़ाई च अपना जोगदान देन।
- ट्रांसपोर्ट मंत्री सतीश शर्मा होरें लोकें गी उंदे घरें कश गै बेह्तरिन सुविधां उपलब्ध करोआने दी सरकार दी वचनबद्धता गी फही पक्का कीता ऐ।

<><><><><><>

Poonch Hide Out

पुंछ जिले च सुरक्षा बलें आतंकवादिएं दे छप्पने आली इक थाहरै दा पता लाइयै उत्थुआं खरी मती मात्रा च थेआर-असला ते गोलीबरुद बरामद कीता ऐ। साढ़े जिला संवाददाता अनुभव मिसरी नै जानकारी दित्ती ऐ जे भारतीय फौज ते जम्मू कश्मीर दे एसओजी समूह आस्सेआ चलाए गेदे इक सांझे तुपाई अभियान दरान जिले दे सांगला इलाके थमां एह बरामदगी कीती गई जेह्दे च त्रै एके-47 रैफलां, 23 मैगजीनां, 922 रौंद गोलियां, 7 ग्रनेड, 4 आईईडी विस्फोटक, घड़ी आंगर दा इक टाइमर, 19 डेटोनेटर ते 200 ग्रू?म हेरोइन दे इलावा होर दुआ समेयान शामिल ऐ। ग्रनेड, आईईडी ते डेटोनेटरें गी मगरा बम्ब नकारा करने आले दस्ते दे माहिरें नकारा करी दित्ता। इस बरामदगी कन्नै इलाके च केई बड्डे आतंकी हमले करने दी साजश गी नकाम करी दित्ता गेदा ऐ।

<><><><><><>

Kathua Search Operation

कठुआ जिले दे हीरानगर इलाके च सानियाल थाहर आतंकवादिएं दी मजूदगी बारे थोई दी इक टकोहदी सूह दे बाद सुरक्षा बलें आस्सेहआ कल संजा शुरू कीता गेदा तुपाई अभियान अज्ज दुए रोज बी जारी ऐ। इस अभियान दे चलदे पूरे इलाके गी घेरी लैता गेदा ऐ ते इलाके गी खरी चाल्ली खंगालेआ जा करदा ऐ। कल आतंकवादिएं दी मजूदगी बारे सूह थोने पर जम्मू कश्मीर पुलस ते फौज दी राइजिंग स्टार कौर नै खतरे गी खत्म करने लेई एह तुपाई अभियान चलाया हा। ताजा जानकारी ते होर ब्योरे गी बलगेआ जा करदा ऐ।

<><><><><><>

LG-Filmotsav

उपराज्यपाल मनोज सिन्हा होरें फिल्म निर्माताएं गी आखेआ ऐ जे ओह फिल्मां बनांदे मौके मनोरंजन ते समाजी जिम्मेवारी बश्कार संतुलन बनाई रखना नेई भुल्लन ते सिनेमा गी समाज च सकारात्मक बदलाव आहन्नने लेई जरूर इस्तेमाल करन। कल जम्मू च पैहले “तवी फिल्मोत्सव” दा उद्घाटन करदे मौके उनें एह गल्ल आक्खी। उनें गलाया जे केन्द्र शासित प्रदेश च रमानदारी ब्हाल करने ते विकास जतनें दे नतीजे च एह फिल्म निर्माताएं लेई पैहली पसिंद बनदा जा’रदा ऐ। फिल्म निर्माण च नमिएं तकनीकें दे महत्व गी उजागर करदे होई उपराज्यपाल होरें मकामी कलाकारें गी आखेआ जे ओह अपने प्रदेश दी कला संस्कृति ते रिवायतें गी उजागर करने लेई कम्म करन। उनें आखेआ जे समाजी बुराइं गी खत्म करने च सिनेमा इक महत्वपूर्ण भूमिका नभाई सकदा ऐ.....

दिन भर चले दे इस फिल्मोत्सव च ताली गेदिएं कोई 40 कोला मतियां फिल्मां दस्सियां गेइयां। जिंदे च बीडस ऑफ ब्रीच गी बेह्तरिन फिल्म, अंतिम संदेश गी बेह्तरिन निर्देशन, लव का लव फिल्म लेई रोहण कपूर गी बेह्तरिन अभिनेता, फिल्म “डान” लेई सपना सोनी गी बेह्तरिन अभिनेत्री दा पुरस्कार दित्ता गेआ। एहदे इलावा “वर्थ” ते नयाा जम्मू कश्मीर एह दा फिल्मां दुए ते त्रीए नंबरे उप्पर रेइयां। तवी फिल्मोत्सव दा सरिस्ता जे.के.सिने एसोसिएशन आस्सेआ जम्मू कश्मीर कला, संस्कृति ते भाषा अकादमी दे सैहयोग कन्नै कीता गेदा हा।

<><><><><><>

CS Healthcare

मुख्य सचिव अटल डुल्लु होरें जम्मू-कश्मीर दे सेहत सरबन्धी खेत्तर च ढांचागत विकास ते सेवाएं दा दर्जा बधाने दे कम्मै च हासल प्रगति दा जायजा लैता। इस सरबन्धै च लाई गेदी बैठका दरान केई सारे महत्वपूर्ण निर्माण प्रोजेक्टें पर चर्चा सने, माहिराना कोर्स शुरू करने ते नमें मेडिकल कॉलेजें च एमबीबीएस दिएं सीटें च बाददा करने ज्जेय मामलें पर बी ध्यान केन्द्रित कीता गेआ। मुख्य सचिव होरें प्रदेश दे दूर-दरेडे इलाकें च डाक्टरें दी कमी गी दूर करने दी जरूरतै पर जोर पांदे होई नमें स्थापित कीते गेदे सरकारी मेडिकल कॉलेजें च माहिराना सेवाएं गी होर तगड़ा बनाने लेई बी आखेआ।

उ'नें सरकारी मेडिकल कॉलेजें दे प्रिंसिपलें गी आखेआ ऐ जे ओह् अपने सरबंधत इदारे च सेवाएं च सुधार सने, अमले गी लोड़चदी सिखलाई बी जकीनी बनान ते एहदे लेई ओह् स्किम्स सने जम्मू ते श्रीनगर दे सरकारी मेडिकल कॉलेजें दी मदाद लेई सकदे न।

<><><><><><>

TB Day

अज्ज विश्व तपेदिक दिवस यानि टीबी सरबंधी कुल संसारी ध्याड़ा मनाया जा'रदा ऐ। एह् ध्याड़ा हर ब'रे 24 मार्च गी मनाया जंदा ऐ ते एहदा मकसद, आलमी सतह दी इस बमारी दे खात्मे आहले जतनें गी तेज करने दे कन्नो-कन्नी लोकें गी एहदे करी सेहत, समाज ते आर्थिक दशा पर पौने आहले माड़े असर बारै जागरूक बनाना बी ऐ। एह् ध्याड़ा सन् 18 सौ 82 च डाक्टर रॉबर्ट कोच हुंदे आसेआ टीबी बैक्टीरिया दी खोच दी ब'रेगंड दे चेतते च मनाया जंदा ऐ। इस ब'रे इस ध्याड़े दा विशे-सार ऐ — हां! अस टीबी गी खत्म करी सकने आं।

<><><><><><>

Dy CM Drug Abuse

उपमुख्यमंत्री सुरिंदर चौधरी होरें जम्मू-कश्मीर दे नौजवानें गी गुजारिश कीती ऐ ओह् भगत सिंह, राजगुरु ते सुखदेव हुंदे ज्नेय शहीदें दी दलेरी ते बलिदान थमां प्रेरणा लैन। इ'नें म्हान क्रांतिकारिण दे कल शहीदी ध्याड़े पर लोआए गेदे इक कार्यक्रम दरान उपमुख्यमंत्री होरें लगातार बधै करदी नशे दी माड़ी कवैतू पर रोक लाने दे महत्वै उप्पर लोऽ पाई ते आखेआ जे नशे दी माड़ी कवैतू करी साढ़े गवांडी राज्यें गी बड़ी मार झल्लनी पेई दी ऐ। समाजी बुराइण खलाफ सांझी कार्रवाईण दी जरूरतै पर जोर पांदे होई सुरिंदर चौधरी होरें लोकें गी गुजारिश कीती जे ओह् किट्ठे रलियै नशा-मुक्त ते सेहतमंद समाज लेई कम्म करन।

<><><><><><>

Transport Minister

ट्रांसपोर्ट मंत्री समीश शर्मा होरें इक पारदर्शी ते जवाबदेह सरकार दे महत्वै पर लोह् पांदे होइ लोकें गी उंदे घरें कश सब्बै जरूरी ते बेहतर सेवा-सुविधां उपलब्ध कराने दे अपनी सरकार दे धेइयै गी फही पक्का कीता ऐ। कल जम्मू दे सैंथ इलाके च लोआए गेदे इक जनता दरबार च मंत्री होरें एह् गल्ल आक्खी। इस दरान उनें मकामी लोकें दिण दिक्कतें शकैमें ते मंगें गी धरोइयै सुनेआ ते उंदे तौले ते पैह्ल दी बिनाह पर नबेड़े दा भरोदा दोआया। लोकें आस्सेआ पुट्टे गेदे प्रमुख मुद्दें च सड़कें च सुधार, बिजली पानी दी सप्लाई, सेहत सुविधा ते इलाके च मिट्टी लेतर कड्डने सरबंधी मुद्दे शामिल हे। इस मोके मंत्री होरें घोषणा कीती जे खौड़ ब्लाक च ड्राइविंग लासैंस लेई आयल ते फिटनेस सर्टिफिकेट जारी करने दा कम्म तौले शुरू कीता जाग।

<><><><><><>

Mushroom Ramban

राई-बाई खेत्तर दे पूरे-पराते विकास सरबंधी कार्यक्रम – एचएडीपी तैहत् इक बड्डी कामयाबी तैहत्, रामबन जिले च खुंबें दी काश्त करी, मुकामी करसानें दे जीवन च सकारात्मक तब्दीलियां आवै करदिआं न। राई-बाई मैह्कमे दे अधिकारिणं दे कुशल मार्गदर्शन तैहत् जिले दे मुकामी करसान हून पूरे ब'रे गै खुंबें दी काश्त करी सकै करदे न। ऐसे गै इक करसान न जसबीर सिंह, जेह्ड़े हर रोज 60 शा 70 किलोग्राम खुंबें दी पैदावार करै करदे न ते बड़ी असानी कन्नै इ'नेंगी बजारें च बेचा बी करदे न कीजे मुकामी बजारें च खुंबें दी बड़ी मती मंग ऐ। आकाशवाणी कन्नै खास गल्लबात च करसान जसबीर सिंह होरें आखेआ.....

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>